

## 瀏陽陶氏譜序

間嘗由水道入都舟過九江見先賢陶侃遺跡又過潯陽得沐靖節先生之高風未嘗不流連繾綣景仰而如見也但其世次之先後苗裔之繁衍未及詳考於傳載之中不免缺畧之憾今春於岳城之西得晤陶君變庵長兄於旅次間聆其言論丰采溫文爾雅不問而知為名宿後人及徐叩其里居世系居瀏陽淵源所自靖節先生後裔也既而出篋中譜系以示焉且道其伯父世瞻兆常兄弟僅懷繪良鴻禧敬夫等慨然以修譜為志披閱之下見靖節為大尉侃曾孫生子五皆承父訓為良士不求聞達而瀏陽陶一支則又佟公居宜豐所衍慶者歷傳至宋生子駿公東坡贈詩有小靖節譽聞十數傳至 **明**全明公始遷瀏陽而卜居焉源流井井昭然不紊抑何條分縷晰若是歟憶昔讀靖節公贈長沙公詩穆然見仁人孝子之思溢於言表及讀命子諸什揚詡先烈乖誠後昆未嘗不嘆奕世戴德不忝前人之意懇乚勤乚也今讀其譜牒序昭穆明尊卑秩然肅然使人孝弟之心油然而生信乎明德之後必有達人其在斯乎其在斯乎至陶氏為瀏邑望族焉昔遊瀏時目擊其盛行見人文鵲起科甲蟬聯紹前微而裕後昆不蔡可知焉樂弁數言於端以垂不朽云

賜進士第揀選文林郎東凌

年家眷弟周開坊驚苞氏 拜撰

公元二零二五年夏月

重刊